

平谷縣志

利

平谷縣志卷之三

人物志

人物

夫靈稟存乎氣清修存乎人故才以地產地以才勝平谷  
雖彈丸之區而鍾靈毓秀代有其人鴻名峻烈垂光發粹  
者亦可歷指其實也故志人物

金

巨構大定時第進士累遷橫海軍節度使寬厚謹慎所至



以鎮靜稱世宗嘗曰巨構外淳質而內明悟鮮有及之者

明

李素坊廓社人洪武間由歲貢除戶部主事□□有功陞

福建按察使尋調湖□□都察院右副都御史閱視邊關

請建通州潞河驛後改江南七年加正二品俸取回京掌

院事洪熙時因事力諫不納致仕歷事三朝忠耿一致

張溥負廓屯人宣德乙卯科舉人正統丙辰科進士任工

部主事管呂梁洪閘清操善政始終如一陞江南戶部員

外郎尋轉郎中剛毅嚴正人不敢干以私時論有包拯之風惜直道難容左遷四川重慶府同知未久而卒

黃綬獨樂社人正統甲子科舉人乙丑科進士授監察御史律已嚴正綽有風裁一嘖一笑不輕假于人一時貪墨吏望風解綬嗣以英宗北征切諫不聽扈駕至土木死之其後蔭子鑑爲國子生

金純字文明營州中屯衛軍籍江南松江府上海縣人宋安節公之後景泰庚午科舉人甲戌科進士除南京刑部

主事繼陞郎中純性方正不濫交游發伏摘奸明猶燭照  
兩檄蘇楊看詳冤獄逮繫幾數百人會簡侍御貢公欽寺  
副鍾公蕃皆往審克之餘或重或輕皆純操筆事竣奏聞  
稱旨所以遠近諸人皆服其公明成化己丑陞四川順慶  
知府未赴丁父憂服闋補廣西桂林當桂巖獠賊肆興搶  
掠合兩廣官軍征勦師臨五月逆命拒師且賊之巢穴多  
雜郡封巡按侍御王公浩議府掌印官親詣以相便宜純  
承檄卽行三日至營遣諜入巖示賊本府太守親來招撫

以蘇衆命，猺賊皆痛哭引領，聽招明日具招牌，親詣賊巖口，猺賊皆魚貫而下。老幼約三千餘人，願歸原土。生理次日，班師事寧。巡按侍御欲執奏其功，純辭以地方無虞爲幸多矣，何敢邀功。侍御公卒，以純招撫羣賊，恩威平定地方，及治郡十事，以聞。上悅，錫誥命一通，進階中憲大夫。未幾，丁內艱，服闋再守江西。廣信會永豐銀坑賊起，隨令近鄉兵民及大姓有力者捕之，賊遂散避陞。山西參政奉命之時，河東旱荒，邊儲告乏，純設法搬運，足備軍用。陞本司

右布政使值事煩多病官怠宦成尋乞致仕歸正德乙亥以子濂貴貤封進階通奉大夫從二品壽八十八考終

張禴字汝吉辛寨社人宏治乙卯科解元壬戌科進士選翰林院庶吉士正德初授兵科給事中轉左給事中時逆瑾擅政毒害正人兵部尙書劉大夏一時領袖瑾尤嫉之必欲寘之死禴獨抗議申救竟得謫戍太監段聰以侍東宮頗得寵倖遂欲借逆瑾之力夤緣乞官其姪禴上疏力諫之改監察御史查盤山東風采益著貪墨望風解綬陞

大理寺丞進左少卿讞獄公平靡有阿撓知縣劉儒侮法  
受贓爲僉事呂和所按儒陰賂權璫反欲罪和公執不可  
竟正儒罪陞僉都御史巡撫宣府丁內艱服闋復巡撫山  
西整飭邊務之餘留心刑獄前後全活幾千人鎮守太監  
吳經貪橫虐民禴寘羣小于法其勢始斂武宗西巡困公  
者如建宮造舟之類不一而足禴皆上疏極諫上怒命執  
禴左右拷訊竟無所得乃止其後又因禴能蕩平妖賊張  
鉞之亂厥功不著朝野咸服之俱蒙璽書金幣之賜嘉靖



壬午卒于官軍民感禴之德立祠以祀其子扶觀歸家惟  
圖書數卷而已禴別號東盤與其弟禴同爲御史人以爲  
兩難云

張禴字汝誠禴之弟宏治乙卯科舉人已未科進士歷任  
刑部郎中正德初權宦有惡都御史強珍欲籍其家者禴  
執不可竟得謫戍奪禴俸半年改查盤御史擢太僕寺少  
卿陞僉都御史巡撫大同剗革宿弊禁制權豪竟以是獲  
譴左遷泗州知州尋陞陝西潼關副使平澄城巨盜轉左

參政奏奪王府侵占民地復陞僉都御史巡撫遼東威重  
老成操縱得宜後卒於官

王鏜字彥聲營州中屯衛人宏治辛酉科舉人乙丑科進  
士筮仕山東德平知縣仁育義裁政平訟理教民樹藝以  
補國稅號稱善治後召爲監察御史天性剛毅不畏權豪  
巡視通倉能剷除宿弊又以通州爲京師咽喉重地奏請  
添修新城以保倉儲至今人稱其便癸酉歲按治西蜀適  
廖麻子喻老人倡亂鏜與總制彭澤竭力剿除事平武皇

嘉悅兩賜璽書中有劾奏奸弊隨機贊襄大盜殄除爾功  
懋著之語且晉俸一級焉是歲典文衡得異材甚多尋陞  
河南僉事詳慎明斷民罔遺奸會歲歉嵩盧盜起鏜調兵  
設策頃爾卽平請發官廩賑濟饑餓所活萬餘人御史王  
公以旂毛公伯溫前後推薦遂轉本司副使時值嘉靖入  
承大統道經南陽衛輝鏜夙夜整集雖供應繁夥罔不充  
裕上大加欣賞召鏜入見行殿優賜茶饌其禮遇如此又  
嘗修葺大梁書院益學田數十頃整飭岳武穆祠重修伏

義畫卦臺異蹟美政不能殫述後丁外艱歸田遂隱居林  
泉終身不復有仕進意鏗爲人正直嚴厲人不敢以阿諛  
進始終制行卓然可取年七十八歲卒于家

金濂字濬之號東溪方伯純之仲子宏治辛酉科舉人正  
德辛未科進士授江南禮部祠祭司主事恪勤敦樸宗伯  
楊公且甚加愛重陞江南刑部山東司員外郎繼陞江西  
司郎中公廉平恕推鞠詳明凡獄之坐駁者多調其司悉  
皆平允丁外艱司寇戈公瑄躬弔其門起復除工部虞衡

司郎中值嘉靖入承大統法制一新濂乘時搜剔前行宿弊悉釐革之凡收受錢糧每出納羨餘必登官簿隨季報堂人皆服其公謹出守鞏昌例當久任六年之間清修苦節始終弗渝吏畏其威民懷其德總制遂菴楊公一清金山王公憲及撫院諸公交相奏薦會鄉官驗封郎中侯一元素□不睦□讒搆之迺有山東運使之遷比至任嚴簿書絕請託有持券以告鹽者通查歲月先後支給二年歲課三倍其初尋以衰老致政人咸歎息濂平生孤介自守

雖歷官中外布衣蔬食泊然也及家居二十餘年閉門養  
眞吟咏自娛未嘗以私干公府享年九十二而終

路中字宗堯坊廓社人正德丙子科舉人授山東蒲臺縣  
訓導持己甚莊誨人不倦壬戌科典山西文衝輿論以得  
人稱之陞山東嘉祥縣知縣剛毅嚴明奸宄屏息才堪治  
煩調禹城縣積穀賑民均田除弊撫按咸加褒獎丁憂起  
復除山西平順縣節操愈勵謙恭不渝吏畏民懷衆方以  
大任期之而以疾遂終惜哉

倪汝廉字介夫別號靜泉魚臺縣尹昇之孫也少孤母王氏撫育之稍長遵母訓勵志苦學動循禮度事母曲盡志養爲邑庠生考校每居孝行首舉筮仕陽穀司訓重德行黜浮靡以身先之束修禮一毫不受士或有喪不能葬者悉捐俸金以助學倉積有耗糧同僚暨諸士援舊規分用廉艱然曰正糧之外升合皆係國儲遂作正支銷衆莫敢強巡按侍御黨公覈其實檄下所司有曰倪汝廉德可範世學堪作人捐俸助喪乃見周急之義耗糧作正足占清

白之操宜具金幣以旌其淑提學憲副陳公亦加禮褒獎  
繼陞徐溝學諭正己率士比穀尤嚴整縣尹邵公以公出  
迫廉署篆遽力辭之雖邵怒亦未肯屈從也時士大夫皆  
服其高未幾丁母艱服闋因祿養母已終懇乞休致無復  
有仕進意嘉靖辛酉歲卒于家後以子光薦貴累贈通議  
大夫通政使司通政使

倪光薦字達甫號東洲獨樂社人嘉靖壬子舉人丙辰進  
士授直隸華亭縣知縣時境內有烏寇光薦撫綏安輯民



甚咸戴道路謳歌滿六載徵爲戶科給事中遷通政使司  
左參議通政使工部尙書萬曆十四年八月卒于官事聞  
神宗悼傷特贈太子少保其制略曰服勤修職固人臣致  
主之忠疏爵酬庸實朝廷逮下之意原任工部尙書仍營  
通政使司事倪光薦器資凝重才識優閑廓雅度於休休  
存小心之抑抑令譽夙騰於諫省賢聲累暢於華途歷事  
三朝雅負銀臺之望踐更九列適階起部之榮平生之節  
概旣完夙夜之寅恭益著已需卹恩載加顯秩綸綍疏榮

宮秩增高於八座旂常紀績國恩永耀於重原於九月初  
六日遣官諭祭曰惟爾性資端重志行雅淳奮迹循良蜚  
聲諫議洊躋九列歷仕三朝夙夜在公出納惟允方升華  
於八座遽歸化於九原諭以牲醪飭其兆域又於十月二  
十三日遣官諭祭曰惟爾素持廉慎薦歷清華守身之義  
不渝納言之司克稱窳窳既具安居有期軫念往勞載頒  
諭祭統觀制誥禮遇優隆則光薦之平生大節蓋可見矣  
王鼎字懋和號南峯鹿角社人歲貢生德性謙謹文學老

成事繼母以孝待弟勗以友始終如一人咸稱之授山東齊河縣訓導嚴立條約訓士不倦又樂周貧乏每竭其力偶以疾卒歸櫬之日士皆徒行泣送至二十五里晏城店猶不忍舍佇立久之然後返

清

王札字又季號暉青坊廓社人讀書有夙悟射藝絕儔順治戊子拔貢通籍歷仕齊楚令襄陽時有首盜者卽率卒往捕之雖從者膽落札怡然自若也尋陞陝西靖寧州知

州靖寧邊地鎮將屯駐者匝於旁郡且近蜀滇黔甘甯通  
道時平西王吳三桂在雲南跋扈隱有不臣之萌鎮將多  
倚其勢潛相煽結提督王輔臣殊無方略札陰憂思防之  
故以演武爲亟宅內堦除悉埋木椿出入時以靴蹴折之  
謂人曰吾以演足力也會得鍊窖悉命工造軍器署內養  
壯勇五十餘人馬二百匹出入游獵羽衛雲從觀者竟不  
知其爲州牧也康熙十二年十二月三桂果反黔蜀諸鎮  
皆應之札聞戒嚴時輔臣首吳逆約叛私書朝廷方獎之

授其子四品京秩札隱憂愈甚謂輔臣素與吳逆何如此  
烏足以縻之也頃之輔臣赴平涼路經靖寧札製饅首勞  
輔臣兵以饅首數紀其兵數僅八百餘人十三年陞奉天  
府治中會大經略英落奉命經略川陝來督師一日獵六  
盤山山曲折高峻鹿伏其上經略問有能得鹿者乎札易  
武服持弓矢步行登山一發應弦而斃經略喜曰爾材兼  
文武奉天腹地無所施其長正宜留此遂具題改爲鞏昌  
府撫民同知留靖寧是年冬經略在寧羗督輔臣等謀進

取及十二月初四日經略與輔臣議不協輔臣標下總兵  
刺殺經略寧羗擾亂輔臣反撤兵回秦州札聞變痛憤淚  
數行下卽具申甘寧撫院華公議勦撫便宜時華撫駐蘭  
州道梗數日不得報札復具申密出靖寧馳晝夜謁華撫  
於蘭州云輔臣標下總兵殺經略輔臣不得已背朝廷其  
子在朝實持兩端且其勢不衆願挺身往諭之可不煩甲  
而定也華撫持重恐有失札憤曰成則天子之福不成以  
死繼之華撫知不可移付以檄旋回靖寧十四年正月帥

甲士百人赴秦州諭逆將至境輔臣命其僞將郊迎四十里相見謂曰久慕吾弟文武全材今來助我乎吾事濟矣札曰我之來非不念將軍威武然固知將軍之不忘皇上也今平西負固一隅反面稱兵逆天悖理指顧可滅將軍何爲助之乎願將軍思之輔臣俯首不言久之曰吾弟且休矣令人送至賓館所從甲士悉居城外關防頗密札在館有臨難詩四章叙入仕途二十年實欲忠君報國顯親揚名不期蹇遭逆亂旣彌亂之無術復俘馘之可羞今臨

難秦州聊賦四章以抒感憤後書嗚青遺筆寄孫紱存留  
倘異日脫難歸家付與族戚如覩吾面也次日往諭輔臣  
如初輔臣仍俯首不言又請俟異日及三日往諭之輔臣  
乃出僞劄署札爲監軍道札擲劄於案仍爲陳說順逆聲  
色俱厲輔臣若首肯者其僞將齊集言曰將軍須自主不  
可聽此一人言違吾等衆議不然將軍願從請自從之輔  
臣默然俯首而退遂有人猝掣札所佩刀羣起擁出札望  
闕呼主罵賊不絕口遂遇害忽有一僧脫衲衣覆之呼忠



臣者再四而去不知所往札所厚醫生尹某聞變卽往收  
遺骸備棺浮厝甲士皆星散札死十四年正月二十九日  
也次年滇黔平平慶道申請甘撫題褒死事之忠贈陝西  
提刑按察使司副使蔭一子入監讀書閏三月初九日札  
遺骸歸平谷帝遣順天府尹徐世茂諭祭是年三月初九  
日靖寧知州某恍惚若夢見札有不忠不孝心事難言等  
語靖寧百姓遂傳札顯聖云

傳載河南杞縣孔衍禴文集

徐進字歷升鹿角社人也生而岐嶷長而謹厚幼失恃能

事繼母復失怙敬讓長兄以德感人橫暴自化以禮持已  
盛暑必嚴舉優生學使者孫公以文行端潔亟稱之乾隆  
三年歲貢十九年選永平府盧龍縣訓導歷任十有一載  
造就特宏士膺鄉薦者李其沛薛佩蘭等八人聯捷者趙  
桐辛大成二人所稱盛年七十餘歲卒於官諸生服心喪  
而送葬者數百人子伯常乾隆甲寅科舉人任鉅鹿縣教  
諭能繼父志焉

賈國傑字含英號先邨少聰穎家貧習耕牧久之就塾師

授讀師老年鮮所講授取講章自閱之即曉文藝學爲文未竟幅鄉先生見之曰此遠器也白其父使應童子試輒冠軍時邑令栗培初山右進士旣擢國傑爲首選召至署爲解經論文學以日進府院試皆第一旋食餼名大起乙酉試秋闈畢以文質邑令鄧來祚祚江右進士決必售竟不驗識者惜之然鄧公知國傑之深以孝友純篤學問優長舉優行學使者德公賜敦本積學匾以獎之壬辰歲試奉派爲應童試者具保結時學使者有所更張闔屬唯唯

獨平邑格不行以是國傑大與學使者忤國傑凡科歲試皆高等此次榜發不與勿院署出寸紙相召或爲國傑危之國傑笑曰此補取一等也懷筆硯入果蒙優獎曰爾文甚佳吾幕中客屈才耳立給卷命一體覆試顧國傑卒未舉於鄉癸卯考授歲貢生年老矣亦不復應京兆試嘉慶元年子名伸第進士逢國家開千叟晏國傑以七十一歲榮與耆筵恩賞御製詩壽杖銀牌等件

王綸字仲宣號漁山例貢生坊廓社人工書畫好擊劍積

書充棟法書名畫無算綸既以工書知名求者踵至晚年頗自矜重不以時應城守營把總某爲某提督求綸書不得以贖鼎進提督辨其僞郤之把總某復詣綸固求卒得書以與乃喜而稱謝又山西人某涉訟會其家有賈於平谷者得綸書以貽當事寃得白時有得綸片紙隻字者皆寶之而山西尤重綸書入質庫可得高價其所藏書及法書名畫不數傳皆散失聞者惜之

劉克用字輔臣歲貢生東文家莊人著有歷代帝王年號

通紀并推衍蘇若蘭璇璣圖詩讀法剏爲七圖藏於家歲  
丙辰禮部尙書紀公昫序其書謂璇璣七圖可與宋元間  
僧起宗明康萬民鼎足而立又言其爲人古貌古心如韓  
文公所稱呂醫山人云

善人

王英辛寨社人知縣臣之父其姑王氏適楊海未幾相繼  
病故家貧不能具棺且無葬地英買棺捐地以葬之又有  
甥劉保住洎姪王尹俱貧不能娶英悉出聘禮與之娶妻

英有園地數畝肥甚族弟王漢懇于英欲買以厚價英遂讓地與漢不受價鄉人義之所居村北有溝每盛夏水積輒深陷不可行英與同鄉張景春建橋以便行人嘉靖十二年知縣曾惠探其事請于巡撫汪公大用賜匾以旌之張景春禴之族兄其弟景陽早世遺二子文賢文起俱幼且貧景春撫養不異已出後俱成立文賢充將軍文起補邑庠生又嘗與王英同建橋一鄉重其義嘉靖十二年知縣曾惠請于巡撫汪公大用並賜匾獎勵

倪恕獨樂社人漁臺縣尹昇之子也性倜儻輕財重義事親以孝稱父病湯藥必親嘗禱以身代與弟恩友愛甚篤延師受業每自程課後中成化丁酉舉人官至鎮江府同知其親識有萬金李清者恕因其質美擇師以教清亦登第授山東新城尹鄉里有婚葬不能舉者輒捐財助之成化弘治時歲值大荒屢出粟賑饑民多所全活其平素舉放銀穀未嘗與人爭利不償者不較也晚年生子汝廉慶先業有托悉焚其券不取又山東河南商人于馬房等



處上納錢糧中有花費不足數者懇恕稱貸恕補納亦不  
責其償諸商人蒙其惠及恕卒往弔皆痛哭且曰倪公之  
德世所希有厥後子汝廉任徐溝學諭孫光遠歲貢生光  
薦工部尙書光又光先俱邑庠生繩繩綿綿金紫相望人  
以爲陰德之報云

王朝相坊廓社人賈一善辛寨社人生員張宦辛寨社人  
義官金宦營州中屯衛人嘉靖四十一年八月屯院監察  
御史秦公按臨謁廟因殿廡傾圮檄本縣知縣任彬修葺

彬廉知張宦等素重義且勤幹悉委督工朝相卽捐四十餘金宦捐二十餘金一善與宦等亦各捐金助傭不數月而落成四十二年冬寇兵突至城下朝相等又慨然出米豆以啖守城軍民及寇退仍委朝相等增築城垣分工繕修又各輸磚灰數窰事竣彬以狀請于巡撫都御史溫公賜匾獎勵仍准預鄉飲後關院監察御史陳公按臨閱城詢知其功進朝相等給花紅鼓樂送學以彰其義

賈珺字爾錫放光莊人幼孤貧讀書未成去學吏吏所傳

多苛刻術瑒曰奚可哉一切反其所爲奉法守義邑有李  
某爲巨盜所引獄將具瑒知其冤力言於官得白他所曲  
全亦甚衆未嘗有私由是邑人咸知瑒名矣期滿考授吏  
員未及選佐江華知縣鄭鼎勳鄭親之如兄弟嘗謂瑒內  
外如一君子人也不惟縣事雖家事亦聽而行之調渭源  
與之俱前後凡二十年無間言及歸其貧仍如未爲吏時  
而名益重瑒性嚴毅寡言笑未嘗以聲色加人里中婦孺  
皆畏而敬之年八十三卒子三國卿附學生國召九品頂

帶國傑優行歲貢生孫名仲嘉慶元年進士授國子監學  
正遇覃恩贈如其官嗣以本縣闔學生員公舉善士呈請  
儒學申送由順天等處學政劉杏芳賜以忠信學禮匾額  
時珺已逝世四十餘年猶得以闔邑之公論膺當事之榮  
褒名不虛立諒哉

### 列女

古語云死節難守節不易旨哉言乎平邑列女亦有其人  
是蓋天地浩然之氣雖婦人女子亦不泯焉今採貞烈之

顯著者載之是編將以昭治化樹風聲以倡厥後人也故  
志列女

李氏坊廓社民李友之女知縣路中妻也隨任之平順中  
在任甫一年偶感時疾李氏知夫疾大漸殆弗興遂自縊  
死未幾夫亦死時山西巡撫都御史王公德明奏稱志節  
冰霜情甚貞烈奉旨旌表其門

羅氏營州中屯衛指揮同知羅鏞之女也幼適指揮詹璠  
克修婦道及年二十七而夫卒羅家貧無子卽勵志守節

誓無二心孀居六十餘年始終一致壽九十三而終撫按咸加厚幣令有司署門匾以獎勸之

劉氏劉和之女馬鸞妻也時田禾茂盛劉獨行途中偶遇本縣皂穎張欽乘其無人輒肆奸汙劉罵不絕口至死不辱巡撫都御史孟公春奏稱貞節不屈于強暴義氣可勵乎民風奉旨旌表其門

李氏生員王楫之妻也十七歲適夫二十一歲夫病故氏哀毀骨立卽欲以死殉夫俄而飲泣言曰舅姑衰老侍奉

缺人遺孤國璜尙在襁褓吾死不負地下人其如兩龍鍾  
一穉弱何因勉爲未亡人矢節終身送往事居兩無所媿  
歷五十年之間如一日國璜由邑庠貢國子監生孝行彰  
聞實資母教知縣任在陞申請奉旨建坊旌表其門

倪氏業儒王李妻夫歿年甫十九哀毀異常誓不更適淡  
素終身族黨罕見探風使者聞於朝奉旨建坊旌表

顧氏遼故武略將軍諱天寵公女幼事繼母王以孝聞長  
歸邑明丙子孝廉馬國銓子文學馭雲爲妻閱四載雲歿

誓以身殉轉念老姑幼子無倚遂堅志守節姑歿喪葬如  
禮鄉黨以爲難教子一驥領鄉薦前後事育支持四十餘  
年之久有如一日邑令申請於朝奉旨建坊旌表

羅氏從龍旗莊陳夢忠妻也忠疾歿遺孤朗方九歲氏堅  
守撫育至於成立朗亦能體母志孝事不違遠近稱焉邑  
令上其事奉旨建坊旌表

關烈婦邑恩貢王漁璜次女適薊門業儒關子三閱祀而  
夫歿卽以身殉合村慕義鐫石垂遠青衿輩具呈督學使



者暨通永道各以門匾旌之

劉氏庠生張緝妻緝死乏嗣遺資頗豐族黨覬覦欲奪劉志氏覺停夫柩於室繼猶子一人守節幾三十年疾終與緝合葬先塋以完同穴之義邑令賜門匾獎之

陳氏民人賈興侯妻夫死子幼誓不更適茹荼終身窮困益堅邑令賜門匾獎之

北獨樂河堡子莊韓某妻張氏十九歲夫亡子在襁褓翁姑迫之他適氏守志堅不從翁姑逐之乃寄宿敗寺中氏

兄張某令其同歸母家氏性耿介執不往遂於村中賃一室使居之有憐其苦節而饋之者亦不受紡績自給猶時時往事翁姑教子成立衣食粗足乾隆三十年六月大雨峨嵋營所通長城口外山水汹涌驟至水過後視莊東西寬一里咸成石灘而莊中一無所損或以爲苦節所感壽八十四歲以無疾卒采風者編入順天志

邑城內陳寬妻張氏年二十八歲夫亡撫孤守節後五十餘歲子死子婦改醮去守孫度日道光四年孫病瘟死孫

婦改醮去依夫姪度日道光十餘年姪又病歿姪婦亦改醮去氏獨居六七年至七十四歲卒苦節垂五十年一生坎坷至於年老無倚天故阨其遇而卒以成其名採風者編入順天志

大旺務莊耿修梧妻王氏十七歲于歸未期月夫遠出貿易年餘有同貿易者歸告謂修梧已於客歲四月病歿口外氏聞信痛不欲生既念翁姑在堂乃節哀矢志孝事終其天年殯葬如禮並乞親友自口外迎夫柩歸葬家貧惟

以紡績針黹自給苦節六十九年至八十六歲卒同治十一年旌

西關王紀妻吳氏十九歲夫亡盡孝於翁姑守節六十餘年道光元年旌獎節孝

埝頭劉坦妻崔氏年二十三歲夫亡貞節自守孝事翁姑卒時七十五歲採風者編入順天志

劉瑄妻楊氏夫亡守節五十餘年嘉慶八年旌

武生王德玉妻王氏守節五十年旌

沈寶德妻李氏守節五十餘年咸豐十年旌

韓德妻紀氏守節五十年咸豐十一年旌

王扶妻朱氏守節五十餘年咸豐九年旌

生員崔桂齡妻董氏守節三十年旌

張有興妻張氏守節四十年同治元年旌

陳俊妻白氏守節五十年同治八年旌

胡傑妻趙氏守節六十年光緒元年旌

張瑞妻張氏奉事孀姑守節四十年光緒元年旌

劉自伸妻王氏教子入庠守節三十年光緒元年旌

陳文元妻于氏文元從戎連鎮沒於王事事載順天志昭

忠表守節三十年光緒元年旌

駐防鑲黃旗李逢春妻王氏守節四十年光緒元年旌

趙才妻耿氏守節四十年光緒二年旌

王慶廷妻陳氏守節三十年光緒二年旌

駐防正白旗劉文昌妻陳氏守節四十年旌

陳朝英妻張氏教子入庠守節三十年光緒四年旌

駐防鑲黃旗生員周燾妻王氏守節四十年光緒八年旌

王鏞妻王氏教子成名守節  
年光緒八年旌

倪貴德妻王氏守節三十六年

王際芳妻崔氏守節三十餘年

倪朝德妻李氏守節五十七年

張恒妻章氏守節三十餘年

以上皆光緒四年題旌

馬各莊正白旗徐常保之妻吳氏守節四十餘年嘉慶十

八年旌

東土門王均妻馬氏守節旌

又張招福妻張氏守節旌

莊窠于躍淵妻張氏守節旌

大旺務耿逾厚妻梁氏守節旌

西高村李文會妻張氏守節四十餘年光緒三十一年旌

埝頭莊劉步雲妻李氏守節旌

東高村監生王國相妻任氏夫亡守節教子成名光緒二

十八年旌



又文生趙曇妻張氏夫亡守節教子成名光緒二十九年旌

上紙寨王臣妻李氏夫亡守節光緒二十一年旌

又王自成妻孔氏守節四十餘年旌

南獨樂河喬鵬搏妻曹氏守節五十餘年光緒三十年旌  
埝頭莊劉惠妻張氏守節四十餘年

城子莊張福堂妻陳氏守節四十餘年光緒三十三年旌

大旺務耿維賢妻賈氏夫亡守節民國六年旌

城子莊安步雲妻常氏夫亡守節三十年民國八年旌

王節婦安氏邑城內王印之妻也幼年于歸事親克孝宜  
家雍睦里黨稱賢二十六歲夫亡氏哀毀異常柏舟矢志  
持霜節三十餘載光緒三十四年經禮部奏請奉旨旌表  
壽六十九歲而終民國八年邑紳以氏艱辛往迹雖渥褒  
錫之榮而節烈英靈宜享馨香之祀公請邑長備案送入  
節孝祠義取昭垂用資觀感

喬節婦曹氏邑庠生曹整之女十八歲適太學生喬鵬萬

子侑生鍾毓越年餘鍾毓病歿氏年甫二十未有子女而  
遽悲寡鵠誠人情所難堪者卒能堅其節操以事翁姑嗣  
兄子樹仲爲後撫育如己出民國四年邑長沈銓上其事  
大總統頒給褒章並松筠勵節匾額以旌之

南獨樂河陳某妻張氏年二十一歲夫亡子啓基生甫二  
月氏事姑教子勤儉度日及啓基入邑庠氏年五十歲守  
節已三十年

西瀝津莊王桐妻楊氏孝事翁姑持家勤儉齋已三十餘年

捻頭劉文玉妻周氏夫亡守節五十餘年光緒三十一年旌  
耿烈女鑲黃旗人年甫十三頗解禮義父固勳舊屯長主  
徵女入侍女惧辱箠室仰藥死其父痛女死亦嬰疾而卒  
山西蒲州府知府劉登庸女幼字山陽程氏子允元允元  
隨父南歸登庸旋病歿眷口流寓津門俄而女之姊若妹  
復相繼逝女焚獨無依及笄舊族名門頗多議聘女深明  
大義執不可始以針黹自給繼乃遯迹尼庵深自隱晦雖  
十歲之童未由一覩其面後允元隨漕船北上訪得之經

幫弁移明天津縣召女至署諭踐盟約卒偕伉儷然年已各五十餘矣兩江總督高晉以其事奇理正奏請旌表給

銀建坊此乾隆四十二年事

事載東華錄

劉某妻王氏樂善不倦邑令勒石表其墓

在縣城北門外東北塔兒坎之南

西關孫常生之女孝根天性因父母無子矢志不嫁奉侍

晨昏邑紳感其孝呈請題旌

事在光緒三十年

馬節婦傳

顧氏家三韓文武世族簪纓累代不絕其後屢罹兵難遂

至中落上餘伯仲二人清初隨世祖章皇帝入關居京師  
長天祚舉孝廉判南雄府次天寵嫻戎事多力善射英勇  
絕倫累功爲防禦守恩封武略將軍生女幼失恃撫於繼  
母王女性幽閒動遵古訓事王以孝聞其侍僕婢則一以  
仁厚溫良爲本年十六歸平谷馬氏明丙子孝廉化字先  
生子文學馭妻妻母孀婦事之克孝居恆相夫子治家御  
下待親戚族屬曾未聞有愆儀鄉黨族閭共稱賢越三載  
妻疾卒婦年十九生子甫三歲卽今邑庠廩學生一驥他

無倚凡妻衣衾棺槨含殮皆婦自理累日不食哭而痛絕者數次姑察其意必以身殉也告姻婭輩曰吾一兒一婦一孫他無倚吾兒死賴有婦婦孝不啻兒婦存謂卽吾兒存可也今兒死婦痛又將死婦死吾孫其胡賴以生不如吾先日暮死吾烏忍觀此哉婦聞之愈慘痛不勝尋止痛不哭起視事強食姑前且再拜於夫子柩曰姑孀而髦子孤復幼兩者皆未亡人分內事也倘妾盡一身之事其如孀姑幼子何遂立志誓守貞節治喪營葬窀穸如禮嗣是

惟孝事孀姑備承色笑姑竟不知有喪子苦教一驥讀書  
慈嚴並至雖艱難困頓不廢己未地大震平谷無完屋姑  
髦年常流離瑣尾間婦能令不失所且衣服飲食其所以  
溫飽乎姑者殆愈於平日又期年姑歿婦哀悼崩摧凡衣  
衾棺槨含殮仍婦自辦治喪營葬窀穸又悉如禮鄉黨族  
閭以爲難先是馬氏代積有產至是婦姑歿子幼雖至戚  
者亦見侵謀初固未之覺也厥後侵謀盡露婦正色曰使  
孤寡可欺行且無天理矣侵謀者聞之皆感悔念不復萌



爲子娶王氏甚賢且孝又克勤克儉敦厚寡言佐夫子奮志學業其姻黨之狡者咸目之爲愚婦曰此正見女子之德耳歲丙寅一驥入泮獲報且喜且哭及子公服拜堂前乃哭益甚一驥孝不自安長跪請命曰吾非爲汝夫婦不善事我也汝父沒吾以汝祖母與汝故未卽殉今汝祖母逝其往矣吾烏乎不哭汝幸厠鬻宮汝祖母不獲見汝父不獲見獨吾見吾烏乎不哭汝成立汝婦復能孝吾吾不及孝事汝祖母吾烏乎不哭且吾向哭汝祖母恐吾痛且

死今汝祖母杳乎不知所往吾思之吾又何能已於哭然  
後人知節婦於夫子既歿時遽止痛不哭者孝之至也義  
之至也其後子能成立媳復孝事按之常情當必欣慰顧  
追感而哭者益見孝之至義之至也予既得其詳於紳衿  
父老復於課士之暇知一驥宿學多才能詩能文試輒冠  
軍爲遠近知名士下惟苦志足不窺園壬午闈幾售予每  
愛其莊重篤實而不知其家學有自且更有誓栢丸熊之  
賢母焉予不勝肅恭起敬故樂取其事而爲之傳

賈采公曰古稱嬰臼事天下羣羨死易生難一語謂非心如金石精誠貫日月者不能余傳馬母顧節婦而不能不欽其爲人焉夫以馬生馭妻早世孀母老髦遺孤幼稚外無期功強近之親內無伯叔兄弟之藉以一閨中人歷諸艱辛而送死養生無憾豈非烈丈夫所不及哉教子讀書克成自立杜侵謀以保馬氏代積業微特馬氏貞媳直孝子矣而要其所以終始不渝克底於全者則在止痛不哭之際卒能奉孀姑而婦以代子撫遺孤而母以兼師也然

幸有孝子一驥厥後請命一事得盡發其母觸感輒哭之  
義不然忍痛數十年將流俗人幾無以盡白歲癸未聖天  
子下昇平詔求天下忠孝節義之事因上節婦事實於採  
風使奏奉褒揚建坊旌表天之報施節孝亦洵不爽與

王節婦倪氏傳

宋文憲公曰婦以節著非常也變也變而不失其正不亦  
善之善乎文曰婦以節著固變也非常也婦以節著而上  
無依下無望矢志完貞至老不隳其亦變之變而又善之

善之尤者也平谷王節婦姓倪氏世居平谷爲名族業詩  
書科貢舉進士不絕官自州縣以及通政尙書皆有父名  
爾訓明經生氏年十五適明庚午孝廉王鼎鷲子王李三  
年李病沒子女未育矢志以死殉閉戶自經者三皆救免  
不獲遂親戚姻婭交相勸諭以他適恐幼弱無能久持中  
道改操不如無守也氏悉知親戚姻婭意具以白曰靡不  
有初鮮克有終吾豈敢謂勸者之無意哉於是泣血引刀  
自刺以明其志親戚姻婭亦悉知堅不可奪亦不復勸越

異時剪髮垢面衣百結之衣食糲食餐不出壺足不窺戶  
惟一意事繼姑恩勤無異所生有痛則哭哭無不痛今行  
年六十矣苦節四十餘年之久蓋怡然如一日焉邑尹曰  
士君子讀書稽古尙考千百代莫不願效聖賢領其緒論  
似人人孝子人人忠臣也者及一旦利害卒陳而頓失其  
生平者比比節義蓋若斯之難也節婦倪氏何所圖利哉  
不過曰吾完吾節而已矣眞變之變而善之善之尤者也  
移風俗美教化有司之職故於倪氏貞節之概樂取而爲

之傳云

哭從妹詩

王綸

從妹字葵眞秉性幽閒負質聰穎解詩書妙裁剪善言詞  
嫻禮讓誠閨閣中英賢也其處室不惟族黨罕窺其面卽  
婦女之輩非端正人亦不輕接先慈每語人曰此女志不  
小靜淑穎悟又其末也每相見輒歡甚刺繡之餘往往扣  
古之節烈名媛先慈喜爲之道以是先從祖母及從叔從  
叔母咸珍異之而慎於擇偶遲之久歸薊門關子關子少

孤從妹事孀姑最謹伴夫子誦讀午夜不輟急望其成名也先是關子愛其所生女未週歲而殤關子傷之由是感疾日甚從妹禱神求救願以身代嗣是疾益甚奉侍百五六十日竭簪鉞以佐參苓繼乃知其不起密語吾從叔母曰婿疾漸矣幸父母勿以不孝女孤苦爲念所以不忍甘心者身爲女子未能報敏勞耳從叔母未之解也及月中忽駕車至平從叔方憂懼見從妹至驚愕失常責以擅離關子之疾對曰吾思家切一看父母伯叔諸母曰婿疾



何似曰疾漸矣自卽刻馳歸耳吾從叔未之解也越數日  
關子歿從叔往臨其喪哭畢入慰妹多端始猶哀繼則拭  
淚爲笑曰父忘女遶膝時教以讀書耶三才者天地人女  
雖不孝身爲人婦然人也幸勿重繫念從叔方私慰無他  
計終未解也趨出與關子胞兄語茶未畢忽報從妹死矣  
舉家悉入從叔亦入視之自縊於衣厨前竟溘以逝矣嗚  
呼何志之堅而行之密也旣不留遺憾於夫家復不設疑  
意於父母從容就義視死如歸借歸寧以終孺慕祈神求

代侍疾佐殮終之以身殉且不肯令一人知眞閨閣中英  
賢不愧吾叔祖之忠有合吾祖母之節者哉旣傷且敬無  
以爲懷謹隨從叔及族閭設奠序次其始末並作篇什以  
哭之曰嗟薄命兮遭憂患閉閨房兮影形單一十九歲兮  
舞雙鸞別父母兮路漫漫事孀姑兮婦道完望關子兮大  
鵬搏勉志業兮多端午夜篝燈兮氣體寒雞鳴復櫛沐而  
晨炊兮敢逸安皇天不弔兮降難俾夫子兮病殘痛將危  
兮肺肝祝神明兮夜闌願身代兮求寬常流涕兮皆不乾

終不起兮病攢魂飄飄兮不可干仰天一慟兮行路心酸  
指日長號兮生命已拚含殮兮親看夫子兮蓋棺顛望兮  
峰巒阿爺至兮接勸恐傷心兮強顏述三才兮咏關關見  
此志之不移兮不知其死事之心堅嗚呼志節爲重兮名  
義可全彼苟活兮生枉然正氣兮塞地天姓名兮凌雲烟  
垂懿範兮永傳列青史兮萬年

仙釋

仙釋之徒蟬脫羽化涉於誕元門覺路流於無固吾儒所

不道也然漢文帝之遇河上公宋太宗之遇陳圖南載在  
方策亦未嘗泯焉平谷琳宮梵宇遠近相望其仙釋奇異  
之迹具于殘碑斷簡者又不可不志也故志仙釋

長春真人不知何處人元至元丁亥駐于長春宮因號長  
春真人燕京東諸帥北面執弟子禮請醮于盤山棲雲觀  
隊仗過平谷飯于城東獨樂莊之延祥觀中有一栢枯瘁  
歲久了無生意真人起而捫之輒歎云可惜可惜明年歷  
春及夏其栢復生鬱茂如故南塘老人張天度作詩以紀

其事

先農壇

草野之本務莫重於農國家之祀典莫先於農所以寄生  
民之命裕天府之儲也皇上特發帑藏創建壇壝其意有  
在也夫故志之

先農壇

雍正六年九月署順天府薊州平谷縣項景倩奉旨督建

皇莊

皇莊之設自明至清由來舊矣本朝定鼎從龍之衆率多

關左世族其間隨京師應運生者不乏能奇才異可以遴  
用王庭迨我聖祖仁皇帝雅化作人鐫除格例故親王以  
下屯長凡隸籍天家者子弟俱准考試而一時遞進之彥  
功名卓卓可徵益得之養育者深矣尤可羨者完公樂輸  
之士不惜名器褒嘉榮及先後洵不世之隆遇哉志皇莊

徐長保

馬家莊

陳 昱

張家莊

鄉長

國家八旗星列畿輔戶口日繁歲辛亥恭值今皇上龍飛九五宵旰勵精勤勞鴻業念滿漢雖屬一體而整飭實有分途特允廷臣之請專差大部之員按旗分理庶務或值山陬僻壤鞭長不及之域就三韓華閩子弟中選其醇謹諳達者充爲鄉長屯日本官躬請俞允給以匾額匪惟示寵異亦以勵清修也且俾其顧名思義型範一方尙美行戒汚俗行之旣久而協和時雍之盛不求至而自至矣其

資益於州縣也豈淺鮮哉志鄉長

屯目附

在城鄉長

李懷璧 匾曰敬慎其事

東路鄉長

陳錫爵 即奉旨旌表節婦羅氏之孫匾曰品堪型世

西路鄉長

史大正 匾曰厚德可風

南路鄉長

劉輔漢 匾曰鄉國儀型



北路鄉長

周伯醇

匾曰勛勤倚賴

屯目

徐選

鄉耆

康順

日勤屯人

王之奇

獨樂社人

楊文舉

崔逢吉

鹿角社人

賀白魁

太務屯二甲人

宋明輔

坊廓社六甲人

劉兆祥 坊廓社人

郭隆 坊廓社十甲人

### 農官

周禮大司徒之屬七十有八而司稼與焉蓋以巡邦野辨  
種稷審地利也大田之詩亦云田峻至喜周先王急本務  
而重稼穡則農有專官意深遠矣邑今設此行古道也故  
志之

賈維新 鹿角社人

李奉全 坊廓社人

張富 日勤屯人

趙文秀 坊廓人



災祥 邑人陳景伊輯

康熙十八年七月二十八日地震 另有記

乾隆三十年大水歲大饑

嘉慶元年五月二十五日大雨雹形大如雞卵無麥秋禾

大熟米賤每斗制大錢一百文

六年夏霪雨連綿四十餘日大水秋不登

七年蝗七月初旬其飛蔽天

二十四年四月初八日酉時有怪風自東南來陰霾

蔽天晝晦室內皆燃燭七月初八日縣西南西高村  
莊午後有怪風兼雨自西南來由村內斜過其過處  
房屋摧敗甚有將屋之上蓋連樑掀至街外者莊有  
關帝廟西向殿之南山墻刮去一半樹木或倒或折  
莊外自西南至東北一里許禾盡偃其平如掃

道光元年七月轉筋霍亂時疫大作直至八月死者不可

勝計

三年二月朔日食是年大水歲饑

四年自春徂秋瘟疫大作又兼客歲秋禾不登人多無食死者不可勝計甚有全家病沒無人埋葬有因年荒無資棺殮而藁葬者

十年六月初一日未時雷震邑南城樓

十二年閏九月是年春夏大旱近城十餘里於六月二十八日始雨其他處有於七月初旬得雨者有於十四五日得雨者人別無可種至有種丸豆大麥者亦獲微熟其他禾稼直至九月尙不盡熟經霜而枯

歲大饑

十七年七月十三日酉刻大雨雹有大如雞卵者有大如碗者由城內至城西二十餘里接連三河界秋禾盡平城內外瓦屋碎其大半

十八年秋七月十八日酉刻雨雹大如卵城東南北長二十餘里北自北山後不知起自何地南至南山薊州界東西寬五六里秋禾盡損

二十年二月朔已刻至未刻日食八分天氣昏暗自

六月十八日至七月十七日霪雨連綿大水

二十九年二月朔日食雲陰不見

三十年正月朔日食十月十七日大雪天氣嚴寒至

十一月初九日自丑至辰大雨

咸豐二年十一月朔日食九分五十一秒未盡者如線天  
色如暮

六年八月初七日至初十日飛蝗蔽天早田無傷晚

田損又九月朔日食



七年八月朔日食是年春蝻無麥秋禾熟

八年六月蝻自西南三河境至大王務莊霽霽莊秋  
禾半傷

十一年六月朔日食十月十一日大雨雷

同治元年十一月朔日食

十年夏大水凡山居者水勢尤猛田皆冲損人被冲  
溺者甚多且有不得其尸者

十一年五月朔日食七分六七七月霪雨大水凹地秋

禾皆損

光緒三年五月十六日午前晴陰相半午後申刻大雨如注環山蛟水漲發縣東夏各莊漂沒男女十數口南太務莊一帶房屋冲毀者十之三四雨後遠眺凡山半出蛟處皆灰白色十數年不生草木

民國六年六月十六日烈風雷雨雹禾稼多損十七十八等日雨大水田禾多被冲淤及秋晚田不熟經霜而枯歲大饑是年由官府調查分別被災輕重放義賑

給以棉衣銀洋銅元等項

九年旱歲歉收米價每斗漲至制大錢一千一百文

合銅元一百一十枚

地震

此事舊志缺而不載因遍探平邑各處舊碑及三河縣志并歷驗其崩陷跡而爲之記

陳景伊

康熙十八年七月二十八日巳時忽地底如鳴大礮繼以四遠有聲如千百石礮自西北來又如數千萬馬颯沓而至始而廬舍簸蕩如舟在風浪中繼則全然傾圮壓斃者無算其生者亦無不破顛折體頃又聞喧噪聲云地且沉

爭登高緣木而避蓋地折裂丈餘黑水兼沙從底湧泛有  
騎驢行道中者遂裂而墜杳無形影忽又聞大火且至乃  
傾壓後竈中餘燼從下延燒而然山多崩陷平谷東南自  
水峪莊至海子及新開峪連及薊境之盤山其崩陷尤甚  
海子莊東南有山南北長里許名鋸齒崖山皆參差鬆散  
形如鋸齒蓋地震搖散而未崩陷者其他中斷中刀切而  
止存其半者皆崩而陷入地中者也邑西北七里大辛寨  
莊南有磚井形歪斜人呼爲搬倒井亦地震移動之所致

是時城郭村莊房屋塔廟蕩然一空遠近茫茫了無障隔  
黑水橫流田禾皆毀闔境人民除墻屋壓斃及地裂陷斃  
之外其生者止存十之三四更兼秋禾不登人多無食又  
有餓死及逃亡者戶口蓋寥寥矣大抵縣之四境較低於  
舊時或二尺或五尺或一丈不等如甌之脫壞至八月初  
一日上諭着戶工二部堂官一員查明具覆施恩拯救閣  
臣會議具請奉旨着侍郎薩穆哈主事沙世八月初六七  
日到縣散賑每戶各白金一兩至九月十五日又奉旨凡

遇災壓死之男婦每名給棺殮銀二兩五錢伊親屬具領孩幼不給又先於八月初九日上諭通州三河等處地震重災分別豁免錢糧巡撫金查明平谷三河最重香河武清寶坻次之薊州固安又次之重者將本年地丁錢糧蠲免次者免十分之三又次者免十分之二嗣奉旨查明計震所及東至奉天之錦州西至豫之彰德凡數千里而平谷三河極慘自被災以來九閱月矣或一月數震或間日一震或微有搖扞或勢欲摧崩多日尙未寧靜此亘古所

稀有之災也方地震時惟又季王札居宅與伊嫂旌表牌坊屹然無恙若鬼神呵護之者或者又季官鞏昌罵賊殉節其兄王楫早故伊嫂李氏二十一歲守志撫孤奉親一門忠孝之所感歎

按地震後頻遭荒歉民之存者亦久多流亡四望村落幾無烟火嗣至某年邑令賈公龍文山西蒲州人甫下車目擊而心惻焉始設法招集免其徭役雜差俾得各遂生業去任後士民建有遺愛碑在縣西魯各莊廟中

